

歸各給禦寒之具謂是皇帝所賜十一月初十日離皇城以驢車二乘分載十一月二日渡江而來云於是備局請分付公路給馬饋食還送本土上從之○癸巳賜柑于泮宮儒生命題試士賜居首生負柳復明第○備局以獻納趙鳴鳳所啓請禁各營門雜物分定事覆奏曰各營門雜物分定之弊誠如臺啓所陳而一切禁斷多有窒碍之端若營中緊用者則必準定其價無使各邑添補凡係私用切勿分定事請行會各道俾無如前亂雜之弊上從之○備局與裁省勾管堂上相議定為裁省節目請貢物就乙亥裁省之例減其價米十分之一有元貢無進排者並姑減宣惠廳戶兵曹及戶曹所屬衙門用度係經費者亦倣乙亥例裁減別單書入各殿各門守直及掖庭各處守直軍士亦依乙亥例別單付籤減數以入此外各司用度零碎者令各司量宜裁減貢物價既減十分之一則官用作米等雜費亦當依此減捧以身布為用度衙門則尤宜節損以補灾邑減布之代上從之○備局以入診時閔鎮厚所啓木代錢折定事覆奏請勿論政府吏禮曹砲保布樂工布並依定式以木一匹折錢二兩之意分付各司及諸道上從之○甲午西方有氣如火光○丙申憲府申前啓又言李獻英等覆試之命欲覈其所製之能否而當初臺啓以設標用